

Гул билан суҳбат



11:35 / 27.02.2025 1768

Кўринди бу кеча гулда муножот,

Забони ҳол билан кечди мулоқот.

Дедим: «Эй гул, нечун чеҳранг қизилдир?»

Деди: «Эй қул, юз изҳори кўнгилдир».

Дедим: «Недан ажаб нозикбадансан?»

Деди: «Дил нозик эрса, найласин тан?!».

Дедим: «Жисмингда йўқ ғунчангдаги бўй?»

Деди: «Хулқинг оғиздан кўрсатар бўй».

Дедим: «Баргинг яшил эркан, гўзалдир»,

Деди: «Орзу-умидлардан масалдир».

Дедим: «Сўлғин кўрингайсан хазонда?»

Деди: «Бу ерга ётмоқдан нишон-да».

Дедим: «Ҳосилларингни не қиларсан?»

Деди: «Сув ичган ўрнимга тўкарман».

Дедим: «Узмиш гулингни бир неча ёш?»

Деди: «То лаб очилди, кетди бу бош!»

Дедим: «Борми сенинг бир боғбонинг?»

Деди: «Жисминг турарми, йўқса жонинг?»

Дедим: «Булбул сенга ошиқ экан кўп?»

Деди: «Боғбондир ишқ аҳлига маҳбуб».

Дедим: «Ҳар япроғинг санъат нишони»,

Деди: «Ҳар бири боғбон достони».

Дедим: «Нега боқарсан кўкка доим?»

Деди: «Дил талпинар, айтиб «илоҳим».

Дедим: «Қанча қуёшдан баҳравар тан?»

Деди: «Ҳар қанча унга юзланарман».

Дедим: «Ёнингда бу ажриққа не бор?»

Деди: «Тушса назарлар, айлагай кор».

Дедим: «Нега гўзаллик рамзи сенсан?»

Деди: «Доим табассум суннат эркан».

Дедим: «Сен қўлма-қўл халқ ичра доим»,

Деди: «Сен ҳам тиконсиз бўл, мулойим».

Дедим: «Эл юзингга мафтун бўларлар?»

Деди: «Бадбўй эсам, ташлаб кетарлар».

Дедим: «Эсса шабода тебранарсан?!»

Деди: «Гар тебранолмассан, синарсан!»

Дедим: «Ари асал олгай гулингдан».

Деди: «Яхши, ёмон бори тилингдан».

Дедим: «Хуснингга ошиқлар саноқсиз»,

Деди: «Ўткинчи хусн ишқ(қ)а яроқсиз».

Дедим: «Қумғоқ нега гул-ғунча очмас?»

Деди: «Бебахра сув бирлан кўкармас».

Дедим: «Меванг йўғ-у, сен серхаридор?»

Деди: «Хушчеҳраликда яхшилик бор».

Дедим: «Жисмингни юлганни нетарсан?»

Деди: «Илгин ўпиб, атрим сепарман».

Дедим: Недир ҳаётинг қилди барбод?»

Деди: «Барвақт очилмоқ бўлди, ҳайҳот!»

Дедим: «Қайдансан-у, сўнг қайга кетмоқ?»

Деди: «Туфроғдан-у, туфроққа қайтмоқ».

Дедим: «Бу ўртада шаънингга не бор?»

Деди: «Гуллик вазифам қилмоқ изҳор».

Дедим: «Умринг, валекин, унча эрмас»,

Деди: «Бир гул бўлишга етмоғи бас».

Дедим: «Энди қачон сен-ла кўришмоқ?»

Деди: «Сен-ла кўришмоқ ўрни учмоқ».

Дедим: «Менга насиҳат айла бир дам»,

Деди: «Туфроғни ёд эт, ожиз одам!»

Дедим: «Менга васият қил, қадрдон»,

Деди: «Қуллик вазифанг, ҳазрат инсон!»

Ҳусайнхон Яҳё Абдулмажид